

XAKEA

Karpoven azken garaipenari esker pil-pilean jarri da Lyongo lehia

Kasparov larri ibili da beltzekin txapelketa osoan

Pil-pilean jarri zen asteazkenean Munduko Xake Txapelketa. Kasparovek Lyonen txikitu egin behar omen zuen Karpov, eta azken aurreko ihardunaldian luze lehiatu ondoren lortu zuen txapeldun-ohiari gailentzea. Baina azken ihardunaldian Karpovek bere arma onenak erakutsi zituen.

XABIN MAKAZAGA / DONOSTIA

Kasparovek erabilitako Grunfeld defentsak huts egin zion berriz ere txapeldunari, jipoi gogorra jasoz. Karpovek erreginaren peoia zazpi-garren laukitxoraino aurreratu zuen, eta aurretiaz, hamargarren jokaldia erabakitzeko, Kasparovek 23 minutu behar izan zituen; ez zitzaion gustatu Karpovek zaldiarekin egindako jokaldia.

Hamazazpigarren ihardunaldi honetan denbora arazo larriak izan zituen Kasparovek. Ez zuen asmatu Karpoven erasoa eteten, eta fitxak egoera kaskarragoan zituela, luze pentsatu behar izan zuen jokaldi bakoitza. 40. mugimenduan irtenbiderik ez zuela ikusi eta beltzak errendatu egin ziren. Zortzi t'erdina berdinduta, bihar txuriekin jokatu du txapeldunak, bietako inork neurraketa atzeratzerik eskatzen ez badu bederen. Karpov berriz ere kuadrozko jaka jantzita agertuko da, ziur, atzo zorte ona eman zion eta.

KARPOVEN ESTILOKO PARTIDA Azkenekoa Karpoven estiloko neurraketa izan zen. Pixkanaka-pixkanaka, mugimendu ziurak eginez eta abantaila txikiak lortuz, presioa areagotuz. Kasparovek aldiz hasieratik bilatu ohi du borroka txuriekin jokatzeko duenean.

Karpov da betidanik denbora ara-



Kasparov kezkatzen hasia da.

EFE

✓ Kasparovek errazago irabaztea espero zuen, baina Lyonen Karpov maila ona erakusten ari da eta txapeldunak arazo handiak ditu beltzekin jokatzeko duenean

zoak izan ohi dituenak. Kasparovek Lyoneran iristean erraz irabaziko zuela uste zuen, eta horrela adierazi zuen. Baita aditu askok ere. Baina ikusten ari da ezin duela, eta hori kaltegarria da, bere buruarekin duen konfiantzak behera egin bait dezake. Horregatik ibili zen asteazkenean denboraz hain larri. Kezkatzen hasi

da txapelduna, eta mugimendu bakoitza bizpahiru aldiz pentsatzen, ziurtasunik gabe.

Jipoi gogorra jaso du Kasparovek eta ikusi egin behar du errekupe-ratzen denentz. Karpovek zail izango du ordea beste partidurik irabaztea, berdinketa nagusi bait da. Munduko Xake Txapelketako bero-bero dago.

ERITZIA

FELIX IZETA

Egundoko borroka

Pil-pilean dago 'matcha'. Berdinduta jarraitzen dute, eta nik hasiera batean Kasparovek errazago irabaziko zuela pentsatu arren, Karpovek duen maila erakutsi du. Egundoko borroka ari gara ikusten, ihardunaldiero. Txuriek agindu dute orain arte, lau garaipenak txuriekin lortu bait dituzte. Biek, alor hau landu dutela ikusten da, eta abantaila horrela lortzen dute. Taula gainean berdintasuna erakutsi

dute eta nik uste baino paretsuago dabilta. Baina oraindik Kasparovek du abantaila. Berdinketarekin txapela mantentzen bait du eta gainera gelditzen diren zazpi partidatik lau txuriekin jokatu du. Emozioa izugarria da ordea, eta ikusi egin behar zer gertatzen den. Grunfeld defentsarekin larri samar ibili da Kasparov txapelketa osoan. Atzo huts egin zion, eta badirudi beltzekin jokatzeko ez duela planteamendu onik, baliagarrik. Orain arte behintzat ez du erakutsi. Oso arriskutsua da horrela jarraitzea Kasparoventzat eta atsedenaldea eskatu behar du berriz beltzekin jokatu aurretik.

HERRI KIROLAK



Juan Manuel Erasun

«Goenatxo» marka berri baten bila gaur Azkoitiko frontoian

MIKEL ARRIETA / DONOSTIA

Gaur gaueko hamarretan hasita herri kirol jaialdia izango da Azkoitiko pilotalekuan. Bertan, Juan Jose Unanue «Goenatxo» 233 kiloko harri kubikoa altxatzeko ahalegina egingo du. Harri honekin, «Goenatxo» berak du errekorra, 225 kiloko jasoa bait dauka.


«Goenatxo»ren saioaz gain, azkoitiarrek izango dute zer ikusia gaur gaueko jaialdian. Harrijasotzaileei dagokienez, «Gibitegi» 250 kilo-koarekin eta 100 kiloko bolarekin arituko da.

Harrijasotzaileez gain, Erasun eta Etxebeste arituko dira aizkora lane-tan. Erasunek, Javier Mindegia gain-ditu zuen pasa den igandean, baina Etxebesteren aurka lan handia izan-gu du.

Julen Beaskoa eta Alberto Urkiga probalariak Ipazterreko probalekuan ikusiko dute elkar bihar. Bi probalari hauen animaliek, 1.025 kilotaraino kargatutako 850 kiloko harriarekin ihardungo dute. Oinarriko pisua 400 kilo izango da, eta hortik aurrera, kiloko, kilo t'erdia gehituko zaio harriari. Desafioa arratsaldeko bostetan hasiko da eta irabazleak 200.000 pezetako saria jasoko du.

Desafioekin jarraituz, Apaolaza eta Arruiz II korrikalariak beste bat sinatu dute urtarilaren hogeirako. Bi kirolari hauen arteko desafioa Tolosako zezen plazan jokatu da. Guztira, 50 bira eman behar du kiote Tolosako plazari. Jose Apaolaza erreizildarra ibilia da gisa hone-tako probatan; Arruiz gaztea ordea, urtarilaren hogeian arituko da es-traineiko aldiz.

TENISA



MONICA SELES jugoslaviarrak irabazi du Madriden nazioarteko tenis erakustaldia. Jennifer Capriatti estatubatuarra gailendu zuen finalean, 6 - 4 eta 6 - 3. Munduko bigarrena eta azken Mastersean garaile, Selesek tenisaren etorkizuna bere esku egon daitekeela erakutsi zuen. Neurraketa bikaina izan zen Capriatti eta jugoslaviarraren artekoa, eta Steffi Grafek bikote honekin kezkatzen hasi behar du. Madriden erakutsi duten mailak munduko onenak izan daitezkeela iragarri du.



Felix Izeta.